

# Reglement for hovudutvalet for samferdsle

Vedteke av fylkestinget i sak nr 45/03, revidert i sak 110/13 og xx/15

## § 1

### Val og samansetnad

Utvalet er fylkeskommunen sitt hovudutval for samferdsle.

Utvalet har 9 medlemmer med varamedlemmer.

Fylkestinget vel medlemene blant fylkestinget sine medlemmer. ~~Minst ein og maksimalt to av medlemene skal vere medlem av fylkesutvalet.~~

Dersom resultatet av dette vert at krava i kommunelova §§ 36 og 38a om kjønnsrepresentasjon ikkje vert oppfylt, skal nødvendig tal medlemmer i tillegg veljast blant dei fem første varamedlemene til fylkestinget frå kvart parti. Dersom dette ikkje gir nok medlemmer av det underrepresenterte kjønnet, skal ytterlegare medlemmer veljast blant dei andre varamedlemene til fylkestinget.

Fylkestinget vel blant varamedlemene til fylkestinget i rekkjefølgje så mange varamedlemmer som partiet/grupperinga har medlemmer i hovudutvalet, med tillegg av 1-3 varamedlemmer.

Fylkestinget vel leiar og nestleiar.

Valet gjeld for den fylkeskommunale valperioden.

Dersom ein medlem trer endeleg ut av vervet, skal fylkestinget velje nytt medlem, jf. kommunelova § 16, nr 3. Utvalet skal supplerast frå den gruppa som står bak den som sluttar som medlem. Gruppene kan ved gjensidig avtale likevel verte samde om å bytte posisjonar mellom hovudutvala ved slike høve, dersom fylkestinget finn å kunne godkjenne det ved valet. Dersom leiaren trer endeleg ut av vervet skal fylkestinget velje ny leiar, jf. kommunelova § 16, nr 4.

Fylkesrådmannen har møte- og talerett i hovudutvalet, jf. kommunelova § 23, nr 3. Retten kan utøvast av han personleg eller av ein av hans underordna.

## § 2

### Arbeidsområde

Hovudarbeidsområdet for utvalet er saker etter yrkestransportlova, veglova og vegtrafikklova, og andre samferdslesaker som fylkeskommunen har ansvaret for.

Hovudutvalet skal arbeide for å sikre målstyring og resultatstyring, og for å sikre effektiv oppfølging og kontroll av verksemda i sektoren innafor ei ramme av rettstryggleik.

## § 3

### Oppgåver og mynde

I tillegg til myndet som er lagt til utvalet i delegeringsreglementet gjeld følgjande:

#### A) Avgjerdsrett

Hovudutvalet har fullmakt til å:

- Styre forvaltninga av budsjetterte midlar på eigen sektor
- Opprette komitear for å løyse tidsavgrensa oppgåver, jf. kommunelova § 10, nr 5 og 6. Komitear med lengre pårekna funksjonstid enn 2 år skal godkjennast av fylkestinget

Hovudutvalet har elles fullmakt til å gjere vedtak innan dei rammene og etter dei retningslinene som følgjer av lov, reglement eller særskilde vedtak i fylkestinget/fylkesutvalet.

## **B) Tilrådingsrett**

Utvalet skal gje tilråding i følgjande saker:

- Framlegg til årsbudsjett, økonomiplan og andre planar innafør utvalet sitt arbeidsområde
- Skipping av faste utval, styre og liknande i sektoren

Hovudutvalet kan uttale seg i alle andre saker innan sin sektor.

## **C) Oppgåver elles**

Hovudutvalet

- er ansvarleg for godt planlagd, rasjonell og økonomisk organisering og drift av sektoren
- skal velje styre eller utsendingar til generalforsamlingar/årsmøte til fylkeskommunen sine samferdsleverksemdar eller andre verksemdar i sektoren der fylkeskommunen har valrett på representantar dersom valretten ikkje er lagd til andre organ
- er fylkeskommunen sitt samarbeidsorgan med offentlege og private organ med same eller tilgrensande arbeidsområde
- føre kontroll med at vedtak innan utvalet sitt arbeidsområde vert gjennomførte

## **D) Delegering**

Hovudutvalet kan delegera til fylkesrådmannen å gjere vedtak innan nærare fastlagde rammer og retningsliner.

§ 4

## **Sekretariat**

Fylkesrådmannen er ansvarleg for at sekretariatsfunksjonen vert utøvd på ein tilfredsstillande måte, vanlegvis ved fylkesdirektøren. Fylkesdirektøren førebur sakene til utvalet på vegner av fylkesrådmannen og har ansvaret for at sakene er forsvarleg utgreidde, jf. kommunelova § 23, nr 2. Han syter også for at vedtaka vert sette i verk.

Sekretariatet i samråd med leiaren kan innkalle til møta i hovudutvalet personar som ein finn det ønskjeleg å rådføre seg med i einskilde saker.

**§ 5**

## **Sakshandsaming**

For sakshandsaming i utvalet gjeld Reglement for sakshandsaming i politiske utval.